

改正


# 春秋集註

七

				漢書門
			二〇六	
			一五九	
五	八	五	九	類
冊	架	函	號	

內閣文庫			
三	二		漢
五	〇		書
函	五	六	
二	八		
架	冊	號	類

內閣文庫			
番號	漢	2061	
冊數	58	(55)	
函號	275	242	





春秋集傳卷之二十二

考試併用與新

成公一

公名黑肱宣公之母  
在位一十八年謚法安民立政曰成



穰姜夫人齊

辛定王十年  
未七年  
元年  
晉景十年  
齊頃九年  
衛穰

年曹宣五年  
陳成九年  
杞桓四十七年  
宋  
秦桓十五年  
楚共王審元年

春王正月公即位○二月辛酉葬我君宣

無冰



寒極而無冰者常燠也。按洪範傳曰：「豫恆燠，若此政事舒緩，紀綱縱弛之象。」成公幼弱，政在「三家」，公室不張其象已見。故當「涸陰」而常燠，應之。古者日在北陸而藏冰，獻羔而啓。胡之祿位，賓食喪祭，冰皆與焉。此亦燮調愆伏之一事也。今既寒而燠，遂廢凌人之職。然策書所載皆經邦大訓，人有微而不登其姓名，事有小而不記其本末。雨雹冰雪，何以悉書？天人一理也。萬物一氣也。觀於陰陽寒暑之變，以察其消息盈虛，此制治於未亂，慎於微之意也。每慎於微，然後王事備矣。

### 三月作丘甲

作丘甲，益兵也。古者九夫爲井，四井爲邑，四邑爲丘。四丘爲甸。甸地方八里，旁加一里爲成。所取於

民者，出長轂一乘。此司馬法一成之賦也。爲齊難作丘甲，益兵備敵，重困農民，非爲國之道。其曰「作者不冝作也」。唐太宗問李靖：「楚廣與周制如何？」靖曰：「周制一乘步卒七十二人，甲士三人，以二十五人爲一甲。凡三甲共七十五人。然則一丘所出十有八人，積四丘而具一乘耳。今作丘甲者，卽丘出一甲，是一甸之中共百人爲兵矣。則未知其所作者三甸而增一乘乎？每乘而增一甲乎？魯至昭公時，嘗蒐于紅，革車千乘，則計甸而增乘，未可知也。楚人二廣之法，一乘至用百有五十人，則魯每乘而增一甲，亦未可知也。賦雖不同，其實皆爲益兵，其數皆增三之一耳。先儒或言甲非人之所能爲，又以爲丘出甸賦加四倍者，誤矣。」

### 夏臧孫許及晉侯盟于赤棘

初宣公謀以晉人去三桓歸父為是見逐而奔齊矣。今季孫當國恨齊人之立宣公納歸父。文懼晉侯之或見討也。故往結此盟。赤棘晉地也。其稱及魯所欲也。盟非春秋所貴而惡屢盟者。非惟長亂亦國用民力所難給也。成公即位之初方經大故。未有施舍。已責逮鰥寡救乏困之事也。為齊難既作。丘甲矣。聞將出楚師。文遠與晉尋盟。豈固本保邦之道乎。書及晉侯盟于赤棘。非特備齊懼晉。蓋三桓懷忿懟君父之心。將有事于齊。而汲汲欲之者罪可見矣。

### 秋王師敗績于茅戎

程氏曰。王師於諸侯不言敗。諸侯不可敵王也。於夷狄不言戰。夷狄不能抗王也。不可敵不可抗者。理也。其敵其抗王道之失也。桓主伐鄭。兵敗身傷。而經不書敗。存君臣之義。立天下之防也。劉康公邀戎。伐之敗績於徐吾氏。而經不書戰。辨華夷之分。立中國之防也。是皆聖人筆削非魯史之舊文也。然筆於經者。雖以尊君父。外戎狄為義。而君父所以尊戎狄。所以服則有道矣。桓王不以討賊興師而急於伐鄭。康公不以惇信持國而輕於邀戎。是失其所以君天下。禦四夷之道也。書敗績于茅戎者。言自敗也。其自反亦至矣。

### 冬十月

春秋集註

卷七

三

壬定王十二年晉景十一。齊頃十。衛穆十。  
申八年一卒。蔡景二。鄭襄十六。曹  
宣六。陳成十。杞桓四十八。宋文  
二十二卒。秦桓十六。楚共二

### 春齊侯伐我北鄙

初魯事齊謹甚。雖易世而聘會不絕也。及與晉侯盟于斷道而後怨隙成。再盟于赤棘而後伐吾北鄙。齊侯之興是役非義矣。魯人爲鞏之戰。豈義乎。同日憤兵務相報復而彼此皆無善者。則亦不待貶而罪自見矣。

### 夏四月丙戌衛孫良夫帥師及齊師戰于

### 新築衛師敗績

齊師侵虐而以衛主此戰何也。衛侯初與晉同盟于斷道矣。又使世子臧與晉同伐齊矣。又使孫良夫石稷將侵齊矣。及與齊師遇石稷欲還。良夫不可曰以師伐人遇其師而還將謂君何。若知不能則如無出今既遇矣。不如戰也。遂戰于新築。故齊師雖侵虐而此戰以衛主之也。春秋善解紛貴遠怨而惡以兵刃相接。故書法如此。

六月癸酉季孫行父臧孫許叔孫僑如公孫嬰齊帥師會晉郤克衛孫良夫曹公子

# 首及齊侯戰于鞏齊師敗績

郤去 逆反

大國三軍次國二軍魯雖大國而四卿並將是四軍也。當此時舊制猶存。尺地皆公室之士也。一民皆公室之兵也。上卿行父與僑如嬰齊各帥一軍會戰而臧孫許如晉乞師。又逆晉師為之道本不將兵特往來晉魯兩軍之間預謀議耳。成公初立主幼國危為季孫一怒掃境內與師而四卿並出肆其憤欲雖無人乎成公之側有不恤也。然後政自季氏出矣。將稱元帥略其副屬詞之體也。而四卿皆書者豈特為詳內錄哉。堅冰之戒亦明矣。經之大例受伐者為主。而此以四國及之者以一笑之微。殘民毒眾幾獲其君而怒猶未怠。焚雍門之茨。侵車東至海。故以四國主之為憤兵之大戒。見

諸行事殘切著明矣

## 秋七月齊侯使國佐如師己酉及國佐盟

### 于袁婁

齊國佐如師與楚屈完來一也。然陘之役則曰來盟于師盟于召陵。鞏之戰則曰及國佐盟于袁婁何也。荆楚暴橫。憑陵諸夏。齊桓公仗義聲罪致討。威行江漢之上。不待加兵而楚人帖服。其書來盟于師者。楚人自服而求盟也。盟于召陵者。桓公退舍禮與之盟也。在春秋時斯為善矣。若夫袁婁則異於是。齊雖侵虐未若荆楚之暴也。諸國大夫含憤積怒。欲雪一笑之恥。至於殺人盈野。非有擊強

扶弱之心。國佐如師將以賂免。非服之也。晉大夫又不以德命。使齊人盡東其畝。而以蕭同叔子為質。夫蕭同叔子齊君之母也。則亦悖矣。由是國子不可請。令餘燼背城借一。揖而去之。卻谷使魯衛之使。以其詞為之請。逮于袁婁。而與之盟。則汲汲欲盟者晉也。故反以晉人及之。若此類。見曲直之繩墨矣。是故制敵莫如仗義。天下莫大於理。而強有力不與焉。亦可謂浚切著明矣。

八月壬午。宋公鮑卒。○庚寅。衛侯速卒。取

汶陽田。

汶音問。

汶陽之田。本魯田也。取者得非其有之。稱不曰復。而謂之取何也。恃大國兵力。戰勝齊。得其故壤。

而不請於天王。以正疆理。則取之。不以其道。與得非其有。奚異乎。然則宜奈何。考於建邦土地之圖。若在封域之中。則先王所錫先祖所受。經界世守。不可亂矣。不然。侵小得之。春秋固有與。滅國絕祀。世之義。必有處也。曾在戰國時。地方五百里。而孟氏語慎子曰。如有王者。作在所損乎。在所益乎。經於復其故田。而書取。所損益亦可知矣。

冬。楚師鄭師侵衛。十有一月。公會楚公子

嬰。齊于蜀。

按左氏。魯衛受盟于晉。從於伐齊。故楚為陽橋之役。令尹子重曰。師衆而後可。於是王卒盡行。二國



稱師著其衆也。侵衛則書。侵我師于蜀。致賂納質。役而不書。非諱也。書其重者。則莫重乎其以中國諸侯降班。失列下與夷狄之大夫會也。季孫行父爲國上卿。當使其君尊。榮其民。免於侵陵之患。而危辱至此。特起於忿。恃其褊心。而不知制之以禮也。書曰。必有忍。乃其有濟。懲忿窒慾。德之脩也。不伐。不求行之善也。躬自厚。而薄責於人。遠怨之方也。季孫忿。恃弗能懲也。而辱逮君父。不亦憯乎。故春秋史外傳心之要典也。攷其行事。深切著明。於以反求諸已。則亦知戒矣。

丙申公及楚人秦人宋人陳人衛人鄭人  
齊人曹人邾人薛人鄆人盟于蜀

盟而魯與必先書公尊內也。次書主盟者楚也。公子嬰齊秦也。此書公及楚人。則知主盟者楚也。公子嬰齊秦石說。宋華元陳公孫寧衛孫良夫鄭去疾皆國卿也。何以稱人。楚僭稱王。春秋黜之。比諸夷狄。晉雖不競。猶主夏盟。諸侯苟能任仁。賢脩政事。保固疆圉。要結鄰好。同心擇義。堅事晉室。荆楚雖大。何畏焉。今乃西向服從。而與之盟。不亦恥乎。古者用夏服夷。未聞服於夷也。乃是之從。亦爲不善擇矣。經於魯君盟會。不信則諱。公而不書。不臣則諱。公而不書。棄中國。從夷狄。則諱。公而不書。蜀之盟。棄晉從楚。書公不諱何也。事同而既貶。則從同。同正始之義也。從荆楚而與盟。既諱。公於僖十九年齊之盟矣。是以於此不諱。而人諸國之大夫以見意也。

癸定王十三年晉景十六齊頃十一衛定九年公滅元年蔡景四鄭襄十

七曹宣七陳成十一杞桓四十九宋共公固元年秦桓十七楚共三

春王正月公會晉侯宋公衛侯曹伯伐鄭

按龙氏諸侯伐鄭討邲之役也。遂東侵鄭公子偃帥師禦之。覆諸鄆敗諸丘輿。夫討邲之役則復怨勦民非觀變也。遂東侵則蒞師掠境非以律也。覆而敗諸則專用詐謀非正勝也。度彼參此皆無善也。畧而不紀勝負微也。晉侯稱爵而以伐書何也。初為是役必以鄭之從楚也。附蠻夷擾中國則盟主有詞于伐耳。宋衛未葬者為稱爵背殯越境以吉禮從金革之事也。

辛亥葬衛穆公○二月公至自伐鄭○甲

子新宮災三日哭

廟災而哭禮也得禮為常事則何以書。緄氏劉絢曰新宮者宜宮也。不曰宜宮者神上不遷也。知然者丹楹刻桷皆稱桓宮。此不舉謚故知其未遷也。管成而主未入遇災而哭何禮哉。宣公薨至是二十有八月緩於遷主可知矣。言災則不祭之致亦自見矣。此說據經為合。或曰禮稱有焚其先人之室則三日哭。新宮將以安神主也。雖未遷而哭不亦可乎。曰先人之室蓋嘗寢於斯食於斯。會族屬於斯。其居處笑語之所在皆可想也。事死如事生故有焚其室則哭之禮也。神主未遷而哭於人情

何居

### 乙亥葬宋文公

按左氏文公卒始厚葬益車馬重器備君子謂華元樂舉於是乎不臣考於經未有以驗其厚也數其葬之日則信然矣天子七月諸侯五月大夫三月士踰月以降殺遲速為禮之節不可亂也文公之卒國家安靖外無危難局為越禮踰時逮乎七月而後克喪事哉故知華元樂舉之棄君於惡而益其侈無疑矣夫禮之厚薄稱人情而為之者也宋公在殯而離坎出境從金革之事哀戚之情忘矣顧欲厚葬其君親此非有所不忍於死者特欲誇耀淫侈無知之人耳世衰道微禮法既壞無以制其侈心至於秦漢之間窮竭民力以事丘隴其

禍有不可勝言者春秋據事直書而其失自見此類是也豈不為永戒哉

夏公如晉○鄭公子去疾帥師伐許○公

至自晉

宣公薨至是三年之喪畢矣宜入朝京師見天子受王命然後歸而即政可也嗣守社稷之重而不朝于周以拜汝陽田之故而往朝于晉其行事亦悖矣此春秋所為作也公行多不致其書公至自晉何其至也必有以也

秋叔孫僑如帥師圍棘

按左氏取汶陽之田棘不服故圍之復故地而民

不聽至於命上將用大師環其邑而攻之何也魯於是特初稅畝作丘甲稅役日益重矣棘雖復歸故國所以不願為之民也歟成公不知薄稅歛輕力役脩德政以來之而肆其兵力雖得之亦必失之矣。

大雩○晉卻克衛孫良夫伐齊咎如○冬

十有一月晉侯使荀庚來聘衛侯使孫良

夫來聘丙午及荀庚盟丁未及孫良夫盟

齊在良反咎音羔

劉敞曰諸侯有聘無盟聘禮也盟非禮也夷與良夫不務引其君當道而立事專命為非禮不信以

于先王之典故不繫於國以見其逐事之辱非人臣之標此說然也其言及者公與之盟而不言公見二卿之私也盟者春秋所惡於惡之中又有惡焉者此類是也

### 鄭伐許

稱國以伐狄之也晉楚爭鄭鄭兩事焉及邲之敗於是乎專意事楚不通中華晉雖加兵終莫之聽也至此一歲而再伐許甚矣夫利在中國則從中國利在夷狄則從夷狄而不擇於義之可否以為去就其所以異於夷者幾希况又馮弱犯寡一歲之中而再動于戈於鄰國不既甚乎春秋之法中國而夷狄行者則狄之所以懲惡也以為告辭畧而從告乃實錄耳一字為褒貶義安在也

甲 定王二十二年 四年 晉景十三 齊頃十三 衛定

戌 十年 二 蔡景五 鄭襄十八 卒 曹 宣八 陳成十二 杞桓五十 宋共二 秦桓十八 楚共四

春宋公使華元來聘 ○ 三月壬申鄭伯堅

卒 ○ 杞伯來朝夏四月甲寅城孫許卒 ○

公如晉 ○ 葬鄭襄公 ○ 秋公至自晉冬城

鄆 ○ 鄭伯伐許

前此鄭襄公伐許既狄之矣今悼公又伐許乃復稱魯何也喪未踰年以吉禮從金革之事則忘親

矣稱爵非美詞所以著其惡也

乙 定王二十五年 晉景十四 齊頃十三 衛 亥 一年崩 定三 蔡景六 鄭悼公費

元年 曹宣九 陳成十三 杞桓五 十一 宋共三 秦桓十九 楚共五

春王正月杞叔姬來歸

前書杞伯來朝左氏以為歸叔姬也此書杞叔姬來歸則出也春秋於內女其歸其出錄之詳者男女居室人之大倫也男子生而願為之有室女子生而願為之有家父母之心人皆有之而不能為之擇家與室則夫婦之道苦淫僻之罪多矣王法所重人倫之本錄之詳也為世戒也

仲孫蔑如宋○夏叔孫僑如會晉荀首于

穀○梁山崩

梁山韓國也。詩曰奕奕梁山韓侯受命而謂之韓奕者言奕然高大為韓國之鎮也。後為晉所滅而大夫韓氏以為邑焉。書而不繫國者為天下記異是以不言晉也。左氏載終人之語於禮文備矣而未記其實也。夫降服乘纓徹樂出次祝幣史辭六者禮之文也。古之遭變異而外為此文者必有恐懼脩省之心。主於內若成湯以六事檢身高宗克正厥事宜王側身脩行欲銷去之是也。徒舉其文而無實以先之何足以弭災變乎。夫國主山川至於崩竭當時諸侯未聞有戒心而脩德也。故自是

而後六十年間弑君十有四亡國三十二其應亦惜矣。春秋不明著其事應而事應具存其可忽諸

秋大水○冬十有一月己酉天王崩○十

有二月己丑公會晉侯齊侯宋侯衛侯鄭

伯曹伯邾子杞伯同盟于蟲牢

按左氏許靈公愬鄭伯于楚鄭伯如楚訟不勝歸而請成于晉盟于蟲牢鄭服也鄭服則何以書同盟。天王崩赴告已及在諸侯之策矣。以所聞先後而奔喪禮也。而九國諸侯會盟不廢故特書同盟以見其皆不臣。春秋惡盟誓於惡之中又有惡焉者此類是也。

春秋集傳卷之二十二

春秋集傳卷之二十三

成公二

丙子簡王六年

晉景十五齊頃十四衛定四

成十四杞桓五十二宋共四秦桓二十楚共六吳子壽夢元年

春王正月公至自會二月辛巳立武宮

武宮武公之宮立武官非禮也喪事即遠有進而無退宮廟即遠有毀而無立故二昭二穆與太祖而五者諸侯之廟制也曰考廟曰王考廟曰皇考廟皆有祭焉曰顯考廟曰祖考廟享嘗乃止去祖

為壇去壇為壇壇有禱則祭無禱乃止去壇為  
鬼諸侯之祭法也。武公至是歷世十一其毀已久  
而輒立焉非即遠有終之意故特書曰立立者不  
宜立也。

取鄆

鄆音專

鄆微國也。書取者滅之也。滅而書取為君隱也。項  
亦國也。其書滅者以僖公在會季孫所為故直書  
其事而不隱。此春秋尊君抑臣以辨上下謹於微  
之意也。人倫之際差之毫釐繆以千里故仲尼特  
立此義以示後世。臣子使以道事君而無朋附權  
臣之惡於傳有之。犯上干主其罪可赦。乖忤貴臣  
禍在不測。故臣子多不憚人主而畏權臣如漢谷  
永之徒。直攻成帝不以為嫌。至於王氏則周旋相

比結為死黨而人主不之覺。此世世之公患也。歸  
父家遣緣季氏也。朝吳出奔因無極也。王章殺身  
忤王鳳也。鄆侯寄館避元載也。惟殺生在下而人  
主失其柄也。是以黨與衆多知有權臣而不知有  
君父矣。使春秋之義得行尊君抑臣以辨上下每  
謹於微。豈有此患乎。

衛孫良夫帥師侵宋夏六月邾子來朝○

公孫嬰齊如晉○壬申鄭伯費卒○秋仲

孫蔑叔孫僑如帥師侵宋

費音秘

魯遣二卿為主將動大衆焉。有事於宋而以侵書  
者。潛師侵掠無名之意。蓋陋之也。於衛孫良夫亦



然上三年嘗會宋衛同伐鄭矣次年宋使華元來聘通嗣君矣又次年魯使仲孫蔑報華元矣是年冬鄭伯背楚未成于晉而魯衛與宋又同盟于蟲牢矣今而有事於宋上卿受鉞大衆就行而師出無名可乎故特書侵以罪之也左氏載此師晉命也後二年宋來納幣請伯姬焉則此師為晉而舉非魯志明矣兵戎有國之重事邦交人道之大倫聽命於人不得已焉將能立乎春秋所以罪之也

楚公子嬰齊帥師伐鄭○冬季孫行父如

晉○晉欒書帥師救鄭

荆楚僭號稱王聖人比諸夷狄而不赦者大一統以存周使民著於君臣之義也鄭能背夷即華是

改過遷善出幽谷而遷喬木也嬰齊為是帥師又因其喪而伐之不義甚矣經所以深惡之也書卿帥師伐鄭於文無貶辭何以知其深惡楚也下書欒武子帥師救鄭則知之矣凡書救者未有不善之也而伐者之罪著矣按左氏晉楚過于桑隧軍師之欲戰者八人武子遂還則無功也亦何善之有曰此春秋之所以善欒書也兩軍相加兵刃既接折馘執俘計功受賞此非仁人之心王者之事故擇下而苗柝者舜也因壘而崇降者文也次于陘而屈完服者齊桓也會于蕭魚而鄭不叛者晉悼也武子之能不遷戮而知還也亦庶幾哉

丁酉 簡王 七年 晉景十六 齊頃十五 衛定五 蔡景八 鄭成公 踰元年 曹宣

十一陳成十五祀桓五十三宋共  
五秦桓二十一楚共七吳壽夢二

春王正月鼯鼠食郊牛角改卜牛鼯鼠又

食其角乃免牛

鼯音奚

穀梁赤曰郊牛日展解角而知傷展道盡矣其所  
以備災之道不盡也改卜牛鼯鼠又食其角則亡  
乎人矣非人之所能也所以免有司之過也有司  
免適即變異也其應云何許翰曰小害大下賊上  
食而又食三桓子孫相繼之象也宣公有與三桓  
之患至成始弗戒矣理或然也

吳伐邾

邾音談

稱國以伐狄之也吳本太伯之後以俟揚言則周  
之伯父也何以狄之為其僭天子之大號也按國  
語云命圭有命固曰吳伯不曰吳王然則吳本伯  
爵也後雖益熾浸與中國會盟進而書爵不過曰  
子亦不以本爵與之故紀於禮書曰四夷雖大皆  
曰子此春秋之法仲尼之制也而以爲不敢擅進  
退諸侯亂名實者誤矣

夏五月曹伯來朝○不郊猶三望

吳郡朱長文曰禮天子有四望諸侯則祭境內山  
川而已魯當祭泰山泰山魯之境也禮所得祭故  
不書三望僭天子禮是以書之其說是矣楚子軫  
言三代命祀祭不越望而曰江漢沮漳楚之望非  
也楚始受封濱江之國漢水沮漳豈其境內哉此

亦據後世并兼封略言之爾

秋楚公子嬰齊帥師伐鄭公會晉侯齊侯

宋公衛侯曹伯莒子邾子杞伯救鄭八月

戊辰同盟于馬陵

楚人軍旅數起頻年伐鄭以其背已而從諸夏也與莊之欲討徵舒而入陳亦異矣書大夫之名氏書帥師書伐而無敗詞者所謂不待敗絕而罪自見者也晉合八國之君親往救鄭則攘夷狄安中國之師也欲著其善故特書救鄭以美之言救則楚罪益明而鄭能背夷即華善亦著矣前此晉遣上將諸國不與焉此則其君自行而會合諸國則

楚人暴橫憑陵諸夏之勢益張亦可見矣故盟于馬陵而書同盟者同病楚也

公至自會○吳入州來○冬大雩○衛孫

林父出奔晉

戊簡王八年晉景十七齊頃十六衛定六年  
寅三年蔡景九鄭成二曹宣十二陳成十六杞桓五十四宋共六秦桓二十二楚共八吳壽夢三

春晉侯使韓穿來言汶陽之田歸之于齊

汶陽之田本魯田也魯人恃大國之威以兵力齊齊得其故地而不正疆理於天王則取之不以其

道也。卻克戰勝。令於齊曰。反魯衛之侵地。齊既從之。今復有命。俾歸諸齊。則歸之。不以其道也。而齊人貪得。晉有二命。矣也。列卿無所諫止。皆罪也。來言者。緩詞也。歸之于者。易詞也。為國以禮者。無暉於強。而魯侯微弱。遂以歸齊。而不能保罪。亦見矣。

晉欒書帥師侵蔡。○公孫嬰齊如莒。○宋

公使華元來聘。○夏。宋公使公孫壽來納

幣。

納幣不書。此何以書。公孫壽卿也。納幣使卿。非禮也。禮不可略。亦不可過。惟其稱而已矣。略則輕大倫。過則溺私愛。宋公之請伯姬。魯侯之嫁其女。皆

致其厚者也。而不知越禮逾制。豈所以重大婚之禮哉。經悉書之。為後法也。

晉殺其大夫趙盾趙括

按左氏。趙莊姬為趙嬰之亡。譖于晉侯。曰。原屏將為亂。欒卻為徵。晉討趙盾。趙括以其田與卻。奚韓厥言於君。曰。成季之勲。宜孟之忠。而無後。為善者懼矣。乃立武而反其田。然則同括無罪。為莊姬所譖。而欒卻咎之也。故稱國以殺。而不去其官。以見晉之失政刑矣。

秋七月。天子使召伯來賜公命。

召音邵

諸侯嗣立而入。見則有賜。已脩聘禮而來朝。則有賜。能敵王所愾。而獻功。則有賜。成公即位。喪服已

畢而不入見既更五服一朝之歲矣而不加京師又未嘗敵王所懷而有功也何為來賜命乎召伯者賢內諸侯為王卿士者也來賜公命罪邦君之不王譏天子之僭賞也臨諸侯曰天王君天下曰天子蓋一人之通稱

冬十月癸卯杞叔姬卒○晉侯使士燮來

聘叔孫僑如會晉士燮齊人邾人伐邾

按左氏士燮來聘言伐邾也以其事吳故公請緩師不可吳初伐邾季孫固曰中國不振旅蠻夷人伐而莫之或恤亡無日矣當其時既不能救及其既成豈獲已也而又率諸國伐之何義乎前書來聘下書會伐晉侯之為盟主可見矣晉既知其不

可從大國之令而不敢違其不能立亦可知矣

衛人來媵媵盈去又音刺

媵者何諸侯有三歸嫡夫人行則姪娣從一國來媵亦以姪娣從凡一娶九女所以廣繼嗣三國來媵非禮也夫以禮制欲則治以欲敗禮則亂而諸侯一娶十有二女則是以欲敗禮矣備書三國以明逾制為後戒也

已簡王九年晉景十八齊頃十七卒衛定

邾四年七蔡景十鄭成三曹宜十三

秦桓二十三年共九吳壽夢四

春王正月杞伯來逆叔姬之喪以歸

凡筆於經者皆經邦大訓也。杞叔姬一女子爾。而四書于策何也。有男女然後有夫婦。有夫婦然後有父子。故春秋慎男女之配。重大昏之禮。以是為人倫之本也。事有大於此者乎。男而賢也。得叔女以爲配。則自家刑國。可以移風俗。女而賢也。得君子以爲歸。則承宗廟。奉祭祀。能化天下以婦道。豈曰小補之哉。夷攷杞叔姬之行。雖賢不若宋共姬。亦不至如鄆季姬之越禮也。杞伯初來朝魯。然後出之。卒而後逆其喪以歸者。豈非叔姬本不應出。故魯人得以義責之。使復歸葬乎。魯在春秋時。因女之歸。不得其所者有矣。聖人詳錄其始卒。欲爲後鑒。使得有終而無弊也。其經世之慮遠矣。

公會晉侯齊侯宋公衛侯鄭伯曹伯莒子

杞伯同盟于蒲

按左氏爲歸汶陽之田。故諸侯貳於晉。晉人懼會于蒲。以尋馬陵之盟。夫盟非固結之本也。衛獻公言於甯喜。未復國。喜曰。必子鮮在。不然必敗。小邾射以句繹來奔。曰。使季路要我。吾無盟。夫信在言。前者不言而自俞。誠在令外者不令而自行。晉初下令於齊。反魯衛之侵地。而齊不敢違者。以其順也。齊既從之。魯君親往拜其賜矣。復有二命。俾歸諸齊。一與一奪。信不可知。無惑乎諸侯之解體也。晉人不知反求。諸已悖信。明義以補前行之愆。而又欲刑牲歃血。要質鬼神以御之。是從事於末而不知本矣。特書同盟以罪晉也。

公至自會○二月伯姬歸于宋夏季孫行父如宋致女晉人來媵

致女者何女既嫁三月而廟見則成婦矣而後父母使人安之故謂之致也常事爾何以書致女使卿非禮也經有因衰以見貶者初獻六羽之類是也亦有因貶以見褒者致女來媵之類是也伯姬賢行著於家故致女使卿特厚其嫁遣之禮賢名聞於遠故諸國爭媵信其無妬忌之行程氏以爲一女子之賢尚聞於諸侯况君子哉或曰魯女雖賢豈能聞於遠乎曰古者庶女與非敵者則未爲媵固爲之擇賢小君則諸侯之賢女自當聞矣

秋七月丙子齊侯無野卒○晉人執鄭伯

晉繆書帥師伐鄭帥入聲

按左氏楚人以重賂求鄭鄭伯會公子成于鄧秋鄭伯却晉晉人討其貳於楚執諸銅鞮繆書伐鄭鄭使伯蠲行成晉人殺之楚子重侵陳以救鄭稱人而執者既不以王命又不歸諸京師則非伯計也殺伯蠲不書者既執其君矣則行人爲輕亦不足紀也楚子重侵陳與處父救江何異削而不書者鄭亦有罪焉耳夫背夷即華正也今以重賂故又與楚會則是惟利之從而不要諸義也故鄭無可救之善楚不得有能救之名

冬十有一月葬齊頃公○楚公子嬰齊帥

師伐莒庚申莒潰楚人入郕

按左氏楚子重自陳伐莒圍渠丘。城惡衆潰楚師圍莒莒城亦惡庚申莒潰楚遂入郕。孟子曰鑿斯池也築斯城也。與民守之效死而民不去。是則可為也。夫鑿池築城者為國之備所謂事也。效死而民不去為國之本。所謂政也。莒恃其陋不脩城郭決辰之間楚克其三都信無備矣。然兵至而民逃其上。不能使民效死而不去則昧於為國之本也。雖隆莒之城何益乎。故經於莒潰特書日以謹之。者以明城郭溝池重門擊柝皆守邦之末務。必以固本安民為政之急耳。

秦人白狄伐晉

經所謹者華夷之辨也。晉嘗與白狄伐秦秦亦與白狄伐晉。放類不復分矣。其稱人貶詞也。武王伐商誓師收野庸蜀羌鬃微盧彭濮皆與焉。豈亦不謹乎。除天下之殘賊。而出民於水火之中。雖蠻夷戎狄以義驅之可也。亦慮其同惡相濟貽患於後也。中國友邦自相侵伐已為不義。又與非我族類者共焉。不亦甚乎。晉既失信復聽婦人讒說。殺其世臣而諸侯皆貳秦秋交伐比事以觀。可謂深切著明矣。

鄭人圍許○城中城

經世安民視道之得失不倚城郭溝池以為固也。



穀梁子謂凡城之誌皆證其說是矣。昔雖恃陋不設備至使楚人入郢。苟有政令使民效死而不潰。寇亦豈能入也。城非春秋所貴而書城中城其為微守益微矣。王公設險以守其國非歟。曰百雉之城七里之郭設險之大端也。謹於禮以為國辨尊卑分貴賤明等威異物采凡所以杜絕陵僭限隔上下者乃體險之大用也。獨城郭溝池之足恃乎。

**庚** 簡王 **十年** **晉** 景十九卒 **齊** 靈公環元年 **衛** 定八 **蔡** 景十一 **鄭** 成四 **曹** 宣十四 **陳** 成十八 **杞** 桓五十六 **宋** 共八 **秦** 桓二十四 **楚** 共十 具壽夢五

### 春衛侯之弟黑背帥師侵鄭

按左氏衛子叔黑背侵鄭晉命也。其曰衛侯之弟

者子叔黑背生公孫剽。孫林父甯殖出衛侯衍而立剽。亦以父有寵愛之私故得立耳。此與齊之夷仲年無異。其特書弟以為後戒。可謂深切著明矣。

夏四月五卜郊不從乃不郊 ○五月公會

晉侯齊侯宋公衛侯曹伯伐鄭 ○齊人來

媵 ○丙午晉侯獮卒秋七月公如晉

獮乃侯反

此葬晉侯也。而不書諱之也。天子之喪動天下屬諸侯。諸侯之喪動通國屬大夫。公之葬晉侯非禮也。惟天子之事焉可也。傳以晉人止公送葬諸侯莫在焉。魯人辱之故諱而不書非也。假令諸侯者在。魯人不以為辱而可書乎。

冬十月

春秋集傳卷之二十三

*[Faded text, likely bleed-through from the reverse side of the page]*

春秋集傳卷之二十四

成公三

**辛**簡王 **十有一年** **晉**厲公州蒲元年 **齊**靈

**巳**六年 **成**五曹宣十五 **陳**成十九 **杞**桓五十七 **宋**共九 **秦**桓二十五 **楚**共十一 **吳**壽夢六

春王三月公至自晉晉侯使卻犢來聘己

丑及卻犢盟夏季孫行父如晉秋叔孫僑

如如齊○冬十月 犢尺 由反

壬簡王十有二年晉厲二齊靈三衛定十

蔡景十三鄭成六曹宜

十六陳成二十杞桓五十八宋共十

秦桓二十六楚共十二吳壽夢七

春周公出奔晉

按左氏周公楚惡惠襄之偏且與伯與爭政不勝怒而出王使劉子復之盟于鄆而入三日復出奔晉夫人主無誠慤之心而下要大臣盟是謂君不君人臣無忠臣之實而上與人主盟是謂臣不臣既已要質鬼神以入矣又叛盟失信而出奔則是自絕於天也自周無出而書曰出者見周室衰微刑政號令不行於天下爾

夏公會晉侯衛侯于瑣澤○秋晉人敗狄

于交剛○冬十月

癸簡王十有三年晉厲三齊靈四衛定十

蔡景十四鄭成七曹

宣十七卒陳成二十一杞桓五十九宋共

十一秦桓二十七楚共十三吳壽夢八

春晉侯使卻錡來乞師錡魚綺反

晉主夏盟行使諸侯徵會討貳誰敢不從以霸王之尊而書曰乞師何也列國疏封雖有大小土地甲兵受之天子不相統屬魯兵非晉所得專也今晉不以王命與諸侯之師故特書曰乞以見其卑

伏屈損無自反而縮之意矣。聖人作春秋無不重內而輕外。至於乞師則內外同辭者。蓋皆有義。怨復讎貪得之心。是以如此。若夫誅亂臣討賊子。請於天王以大義驅之。誰不拱手以聽命。何至於乞哉。噫。此聖人所以垂戒後世。見諸行事之深切著明者也。

三月公如京師夏五月公自京師遂會晉

侯齊侯宋公衛侯鄭伯曹伯邾人滕人伐

秦

諸侯每歲侵伐四出。未有能條朝覲之禮者。公欲會伐秦。道自王都。不可越天子而往也。故皆朝

王而不能成。朝禮書曰。如京師見諸侯之慢也。因會伐而行矣。又書公自京師以伐秦為逐事者。此仲尼親筆。明朝王為重仔人臣之禮也。古者諸侯即位服喪畢。則朝小聘。大聘終則朝。巡狩于方嶽。則朝觀。春秋所載天王遣使者屢矣。十二公之述職。蓋闕如也。獨此年書公如京師。又不能成朝禮。不敬莫大焉。君臣人道之大倫。而至於此。極故仲尼嘗喟然嘆曰。夷狄之有君。不如諸夏之亡也。為此懼。作春秋。或抑或縱。或予或奪。所以明君臣之義者至矣。其義得行則臣必敬於君子。必敬於父天理必存。人欲必消。大倫必正。豈曰小補之哉。此以伐秦為逐事之意也。

曹伯廬卒于師。秋七月公至自伐秦。

冬葬曹宣公

**甲**簡王 **十有四年** **晉**厲四 **齊**靈五 **衛**定十

**申**九年 **曹**成公負芻元年 **陳**成二十二年 **杞**桓六十八

**宋**共十二 **秦**桓二十八卒 **楚**共十四 **吳**壽

春王正月莒子朱卒 ○夏衛孫林父自晉

歸于衛 ○秋叔孫僑如如齊逆女 ○鄭公

子喜帥師伐許 ○九月僑如以夫人婦姜

氏至自齊

穀梁曰大夫不以夫人以夫人非正也刺不親迎也僑如之不氏一事而再見者卒名耳然則娶于他邦而道里或遠必親迎乎以封壤則有小大以爵次則有尊卑以道途則有遠邇或迎之於其國或迎之於境上或迎之於所館中禮之節可也

冬十月庚寅衛侯臧卒 ○秦伯卒

**乙**簡王 **十有五年** **晉**厲五 **齊**靈六 **衛**獻公

**酉**十年 **曹**成二十三年 **杞**桓六十一 **宋**共

秦景公元年

楚共十五年

吳壽十

春秋傳註 卷七 二十七

春王二月葬衛定公○三月乙巳仲嬰齊

卒

嬰齊者公子遂之子公孫歸父之弟也歸父出奔齊魯人徐傷其無後也於是使嬰齊後之故書曰仲嬰齊此可謂亂昭穆之序失父子之親者以後歸父則弟不可為兄嗣以後襄仲則以父字為氏亦非矣

癸丑公會晉侯衛侯鄭伯曹伯宋世子成齊國佐邾人同盟于戚晉侯執曹伯歸于

京師

稱侯以執伯討也何以為伯討晉合諸侯伐秦曹宣公卒于師曹人使公子負芻守使公子欣時逆曹伯之喪負芻殺其大子而自立至是晉侯執之又不敢自治而歸于京師使即天刑夫是之謂伯討春秋執諸侯者衆矣未有執得其罪如此者故獨書其爵

公至自會○夏六月宋公固卒○楚子伐

鄭○秋八月庚辰葬宋共公○宋華元出

奔晉宋華元自晉歸于宋宋殺其大夫山

春秋傳註

朱魚石出奔楚 共音 恭

宋六卿魚氏蕩氏鱗氏向氏皆桓族也華氏戴族也華元為右師魚石為左師蕩氏汰而驕其公卒已葬蕩澤弱公室殺公子肥華元曰我司君臣之訓而不能正罪大矣不能治官敢賴寵乎乃出奔晉魚石將止之魚府曰元反必討是無垣氏也石曰彼多大勳國人所與不反懼桓氏之無祀於宋也遂自止元於河上元歸使國人攻桓氏殺蕩山出魚石國然後定元之出奔晉與歸于宋皆不省文者著其正也書之重詞之復必有美惡焉詞繁而不殺所以與之也以不賴寵而出奔以國人與晉皆許之討而後入正可知矣蘇轍謂使元懷祿顧寵重於出奔則不能討此說是也山不書氏皆

其族也。背其族者伐其本也。人而無本人道絕矣。焉。藟猶能芘其本根。况於人而忍伐其本乎。

冬十有一月叔孫僑如會晉士燮齊高無

咎宋華元衛孫林父鄭公子鮪邾人會吳

于鍾離 咎其九反 鮪音秋

吳以號舉夷之也。會而殊會外之也。殊會有二義。會王世子于首止意在尊王室不敢與世子抗也。會吳于鍾離于相于向意在賤夷狄而罪諸侯不敢與之敵也。夫以太伯至德是始有吳以族言之則周之伯父也。至其後世遂以號舉者以其僭竊稱王不能居中國之爵號耳。成襄之間中國無霸

齊晉大國亦皆悅首東向而親吳聖人蓋傷之故  
特殊會可謂深切著明矣。

許遷于葉 葉舒 涉反

**丙** 簡王十 **十有六年** **晉** 厲六 **密** 靈七 **衛** 獻  
**成** 一年 **二** 蔡景十七 **鄭** 成十

**曹** 成三 **陳** 成二十四 **杞** 桓六十二 **宋** 平公  
成元年 **秦** 景二 **楚** 共十六 **吳** 壽夢十一

春王正月雨水冰

雨水冰者雨而水冰也。何休曰木者少陽幼君大臣之象水者凝陰兵之類也。冰脅木者君臣將執於兵之徵。未幾而有沙隨莒丘之事。天人之際休咎之應焉。可誣也。而欲

甚廢五行傳亦過矣。

夏四月辛未滕子卒。○鄭公子喜帥師侵

宋六月丙寅朔日有食之。○晉侯使欒黶

來乞師甲午晦晉侯及楚子鄭伯戰于鄢

陵楚子鄭師敗績 鴈於斬反 鄢音偃

不昔師敗績以其君親集矢於目而身傷為重也。當是時兩軍相抗未有勝負之形。晉之捷也亦幸焉爾。幸未持勝之道。范文子所以立於軍門。有罪人能內外無患。益釋楚以為外懼之戒乎。楚師雖敗其勢益張。晉遂怠矣。卒有欒氏之譖而誅王郤



國內大亂聖人備書以見行事之深切著明也。

楚殺其大夫公子側○秋公會晉侯齊侯

衛侯宋華元邾人于沙隨不見公

臣子之於君父揚其美不揚其惡為尊者諱為親者諱禮也。聖人假魯史以示王法。其於魯事有君臣之義故君殺則書薨易地則書假滅國則書取。出奔則書適宿己而與強國之大夫盟則書及叛盟失信而莫適守則沒公而書會。凡此類雖不沒其實示天下之公必隱避其辭以存臣子之禮然則沙隨之會晉不見公是晉侯之大辱深可恥焉者矣。君為直書其事而不諱乎。曰春秋伸道不伸邪榮義不榮勢正已而無恤乎人以仁禮存心而

不憂橫逆之至者也。沙隨之會晉有內難師出後期所當恤者晉人聽叔孫僑如之譖怒公而不見。由在晉矣。魯侯自反非有背仁棄禮不忠之咎也。昔曾子嘗聞大勇於夫子曰自反而縮雖千萬人吾往矣。孟子言浩然之氣至大至剛以直養而無害則塞乎天地之間。沙隨之不見於公何歟。予直書而不諱者示天下後世使知大勇浩然之氣所以守身應物如此其垂訓之義大矣。

公至自會公會尹子晉侯齊國佐邾人伐

鄭○曹伯歸自京師

曹伯不名其位未嘗絕也不絕其位所以累乎天王也。其言自京師王命也。言天王之釋有罪也。善

不蒙賞惡不即刑以堯為君舜為臣雖得天下不能一朝居也負弼殺世子而自立不能因晉之執實諸刑典而使復國則無以為天下之共主矣

九月晉人執季孫行父舍之于茗丘冬十

月乙亥叔孫僑如出奔齊十有二月乙丑

季孫行父及晉郤犢盟于扈公至自會乙

酉刺公子偃

茗音條章造上饒二反

按左氏宣伯通於褻姜欲去季孟而取其室戰於鄆陵之日公將行褻姜送公而使逐二子公以晉難告曰請反而聽命姜怒公子偃公子鉏趨過指

之曰汝不可是皆君也公待於壞隄申宮徹備設守而後行是以後使孟獻子守于公宮宣伯使告郤犢曰魯侯待于壞隄以待勝者郤犢取貨于宣伯而許公于晉侯晉侯不見公公會諸侯伐鄭將行姜又命公如初公又申守而行宣伯使告郤犢曰魯之有季孟猶晉之有欒范也政令於是乎成今其謀曰晉政多門不可從也寧事齊楚有亡而已蔑從晉矣若欲得志於魯請止行父而殺之我斃蔑也不然歸必叛晉人執季文子于茗丘公還侍於鄆使子叔聲伯請季孫于晉郤犢曰苟去仲孫蔑而止季孫行父吾與子國親於公室對曰僑如之情子必聞之矣若去蔑與行父是大棄魯國而罪寡君也若猶不棄使寡君得事晉君則夫二人者魯國社稷之臣也若朝亡之魯必亡亡范文

子謂樂武子曰季孫於魯相二君矣妻不衣帛馬不食粟可不謂忠乎信讒慝而棄忠良若諸侯何乃許魯平赦季孫出叔孫僑如而盟之季孫及郟犇盟于扈歸剌公子偃

**十有七年**  
晉厲七齊靈八衛獻  
三蔡景十八鄭成十  
一曹成四陳成二十五杞桓六十三宋  
平二秦景三楚共十七吳壽夢十二

春衛北宮括帥師侵鄭夏公會尹子單子  
晉侯齊侯宋公衛侯曹伯邾人伐鄭六月  
乙酉同盟于柯陵秋公至自會○齊高無

咎出奔莒九月辛丑用郊

郊之不時未有甚於此者也故特曰用郊用者不宜用也或曰蓋以人饗叩其鼻血以薦也古者六畜不相為用况敢用人乎

晉侯使荀息來乞師冬公會單子晉侯宋公衛侯曹伯齊人邾人伐鄭十有一月公至自伐鄭○壬申公孫嬰齊卒于狸辰十有二月丁巳朔日有食之○邾子貜且卒

○晉殺其大夫卻錡卻犛卻至○楚人滅

舒庸

瑩乙耕又力之反服市  
軫反獲俱得反且子餘反

**戊**

簡王十三年

十有八年

晉厲八弒齊靈九衛  
獻四蔡景十九鄭成

**子**

曹成五

**陳**

成二十六

**杞**

桓六十四

**宋**

平三秦景四楚共十八

**吳**壽夢十

春王正月晉殺其大夫胥童○庚申晉弒

其君州蒲

弒君天下之大罪討賊天下之大刑春秋合於人心而定罪聖人順於天理而用刑固不以大需釋

當誅之賊亦不以大刑加不弒之人然趙盾以不越境而書弒許世子止以不嘗藥而書弒鄭歸生以暉老懼讒而書弒楚公子比以不能效死不立而書弒齊陳乞以廢長立幼而書弒晉欒書身為元帥親執厲公於匠麗氏使程滑弒公而以車一乘葬之於翼東門之外而春秋稱國以弒其君而不著欒書之名氏何哉仲尼無私與天為一奚獨於趙盾許止歸生楚比陳乞則責之甚備討之甚嚴而於欒武子闕略如此乎學者深求其旨知聖人之誅亂臣討賊子之大要也而後可與言春秋矣

齊殺其大夫國佐公如晉○夏楚子鄭伯伐宋宋魚石復入于彭城

此伐宋以納魚石。其不曰納宋魚石于彭城何也。劉敞曰：不與納也。諸侯失國，諸侯納之正也。諸侯世也。大夫失位，諸侯納之非正也。大夫不世也。諸侯託於諸侯禮也。大夫託於諸侯非禮也。其言復入者，已絕而復入，惡之甚。者宋魚石晉欒盈是矣。

公至自晉。晉侯使士旬來聘。○秋杞伯來朝。八月，邾子來朝。○築鹿囿。○己丑，公薨于路寢。○冬，楚人、鄭人侵宋。晉侯使士魴來乞師。十有二月，仲孫蔑會晉侯、宋公、衛

侯、邾子、齊崔杼同盟于虛打。○丁未，葬我

君成公。

魴音房，杼直也。反虛起居反，打他丁反。

春秋集傳卷之二十四



春秋集註 卷七 三十九

春王正月公即位○仲孫蔑會晉欒黶宋

華元衛甯殖曹人邾人滕人薛人圍

宋彭城

按左氏曰非宋地。追書也。然則書圍彭城者魯史舊文也。曰圍宋彭城者。仲尼親筆也。楚已取彭城。封魚石。戍之。三百乘矣。則君為繫之。宋楚不得取之。宋魚石不得受之。楚雖專其地。君子不登叛人。所以正疆域。固封守。謹王度也。

夏晉韓厥帥師伐鄭。仲孫蔑會齊崔杼。晉

人邾人杞人次于郟

楚人釋君而臣是助事已悖矣。晉於是乎降彭城以魚石等歸。遂伐鄭而諸侯次于郟。此皆放於義而行之者也。傳書楚子辛救鄭而經不書者。鄭本為楚以其君之故。親集矢於目。是以與楚而不貳也。棄中國從蠻夷。不能以大義裁之。唯私欲之從。則鄭無可救之善。楚不得有能救之名。經所以削之。不言救也。

秋楚公子壬夫帥師侵宋○九月辛酉天

王崩邾子來朝冬衛侯使公孫剽來聘晉

春秋集註 卷七 三十九

### 侯使荀營來聘

簡王崩赴告已及藏。在諸侯之策矣。則宜以所聞先後而奔喪。今邾子方來脩朝禮。衛侯晉侯方來脩聘事。於王喪若越人視秦人之肥瘠。曾不與焉。而左氏以為禮。此何禮乎。滕定公薨。世子定為三年喪。父兄百官皆不欲曰。吾宗國魯先君莫之行也。喪紀益廢。民習於耳目而不察。故後世以日易月。人子安而行之。不知春秋之義。無君臣之禮。豈不惜哉。

庚靈王二年 晉悼二 齊靈十一 衛獻六 蔡元 景二十一 鄭成十四 卒 曹成七 陳成二十八 杞桓六十六 宋平五 秦景六 楚共二十一 吳壽夢十五

春王正月葬簡王。○鄭師伐宋。夏五月庚

寅。夫人姜氏薨。○六月庚辰。鄭伯論卒。○

晉師宋師衛甯殖侵鄭。○秋七月。仲孫蔑

會晉荀營宋華元衛孫林父曹人邾人于

戚。○己丑。葬我小君齊姜。○叔孫豹如宋

○冬。仲孫蔑會晉荀營齊崔杼宋華元衛

孫林父曹人邾人滕人薛人小邾人于戚

安政



遂城虎牢

險古因反

虎牢鄭地故稱制邑至漢為成臯今為汜永縣巖險聞於天下猶虞之下陽趙之上黨魏之安邑燕之榆關吳之西陵蜀之漢樂地有所必據城有所必守而不可以棄焉者也有是險而不能守故不繫於鄭然則據地設險亦所貴乎天險不可升也地險山川丘陵也王公設險以守其國大易之訓也城郭溝池以為固亦君子之所謹也鑿斯池築斯城與民同守孟子之所以語滕君也夫狡焉思啓封疆而爭地以戰殺人盈野爭城以戰殺人盈城者固非春秋之所貴守天子之土繼先君之世不能設險守國將至於遷潰滅亡亦非聖人之與故城虎牢而不繫於鄭程氏以為責鄭之不能

有也其聖人以待表世之意小康之事邪

楚殺其大夫公子申

辛靈王

卯二年

三年

晉悼三

齊靈十二

衛獻七

蔡

景二十二

鄭僖公

景二十九年

杞桓六十七

宋平

六

秦景七

楚共二十一

吳壽夢十六

春楚公子嬰齊帥師伐吳○公如晉夏四

月壬戌公及晉侯盟于長檮公至自晉六

月公會單子晉侯宋公衛侯鄭伯莒子邾

子齊世子光已未同盟于雞澤

檇初居反

同盟或以為有三例。一則王臣預盟而書同。二則諸侯同欲而書同。三則惡其反覆而書同。夫惡其反覆與諸侯同欲而書同信矣。王臣預盟而書同義則未安。盟于女栗及蘇子也而不書同盟于洮于翟泉會王人也而不書同。然則此三盟者正所謂諸侯同欲而書同盟也。其同欲奈何同病楚也。會于柯陵之歲夏伐鄭楚人師于首止而諸侯還冬伐鄭楚人師于汝上而諸侯還鷄澤之盟陳袁僑如會楚師在繁陽而韓獻子懼乎丘之行楚棄疾立復封陳蔡而中國恐是知此三盟者諸侯皆有戒心而脩盟故稱同不以尹子單子劉子小頑此盟而譏之也。夫王臣附命必恃信明義而後可

以表正乎天下諸侯守邦必尊主奉法而後可以保其社稷今王臣下與諸侯約誓諸侯亦敢上與王臣要言斯大亂之道也則亦不待書同盟而罪自見矣

陳侯使袁僑如會戊寅叔孫豹及諸侯之大夫及陳袁僑盟秋公至自會○冬晉荀

營帥師伐許

僑其驕反

壬 靈王

四年

晉悼四齊靈十三衛獻八蔡景二十三鄭僖二曹成九陳

成三十卒杞桓六十八宋平七秦景八楚共二十二吳壽夢十七

### 春王三月己酉陳侯午卒

午者襄公名也。孔子作春秋在哀公之世，襄官哀公之皇考也。苟不諱乎古者死而無諡，不以名為諱，周人以諡易名。於是乎有諱禮。故孟子曰：諱名不諱姓，姓所同也。名所獨也。然禮律所載則有不諱者。天子兼帝王之道，參文質之中，而作春秋以法萬世。如公薨不地，滅國書取出奔，稱孫之類，所以放其文也。莊公名同而書同盟，僖公名申而書戊申，定公名宋而書宋人之類，所以從其實也。後世不明此義，則有以諱易人之名者，又有以諱易人之姓者。詩書則諱臨文則諱，嫌名則諱，二名則偏諱，愚者違禮以為孝，諂者獻佞以為忠，忌諱繁，各實亂而春秋之法不行矣。

夏叔孫豹如晉秋七月戊子夫人妣氏薨

○葬陳成公○八月辛亥葬我小君定姒

冬公如晉○陳人圍頓

**癸** 靈王五年 晉悼五齊靈十四衛獻九蔡

**巳** 四年 景二十四鄭僖三曹成十陳

哀公溺元年犯桓六十九宋平八

秦景九楚共二十三吳壽夢十八

春公至自晉夏鄭伯使公子發來聘○叔

孫豹節世子巫如晉○仲孫蔑衛孫林父

孫豹節世子巫如晉○仲孫蔑衛孫林父

會吳于善道○秋大雩楚殺其大夫公子  
壬夫○公會晉侯宋公陳侯衛侯鄭伯曹  
伯莒子邾子滕子薛伯齊世子光吳人鄆  
人于戚

吳何以稱人按左氏吳子使壽越如晉聽諸侯  
之好晉人將為之合諸侯使魯衛大夫會吳于善  
道且告會期然則庶之事乃吳人來會不為主也  
來會諸侯而不為主則進而稱人諸侯往與之會  
而主吳則貶而稱國聖人  
之情見矣春秋之義明矣

公至自會○冬戍陳楚公子貞帥師伐陳  
公會晉侯宋公衛侯鄭伯曹伯齊世子光  
救陳十有二月公至自救陳○辛未季孫  
行父卒

**甲** 靈王 **六年** **晉悼** 六 **齊靈** 十 **五** **衛獻** 十 **祭**  
**午** 五年 **景** 二 **十五** **鄭僖** 四 **曹成** 十 **一**  
**陳哀** 二 **杞桓** 七 **十** **卒** **宋平** 九 **秦**  
**景** 十 **楚** 共 二 十 四 **吳** 壽 夢 十 九

春王三月壬午杞伯姑容卒○夏宋華弱

來奔○秋葬杞桓公○滕子來朝○莒人滅鄆

穀梁子曰莒人滅鄆非滅也立異姓以蒞祭祀滅亡之道也公羊亦云莒女有為鄆夫人者蓋欲立其出也或曰鄆取莒公子為後罪在鄆子不在莒人春秋應以梁亡之例而書鄆亡不當但責莒人也今直罪莒舍鄆何哉曰莒人之以其子為鄆後與黃歇進李園之妹於楚王呂不韋獻鄆之姬於秦公子其事雖殊其欲滅人之祀而有其國則一也春秋所以釋鄆而罪莒歟以此防民猶有以韓謚為世嗣昏亂紀度如郭氏者

冬叔孫豹如邾○季孫宿如晉十有二月

齊侯滅萊

乙 靈王 七年 齊悼 七 齊靈 十六 衛獻 十一 宋 六年 蔡景 二十六 鄭僖 五 卒 曹成 十二 陳哀 三 杞孝 公 勾 元 年 宋 平 十 秦景 十一 楚 共 二 十 五 吳 壽 夢 二 十

春邾子來朝○夏四月三十郊不從乃免

牲○小邾子來朝○城費費音

費季氏邑也按左氏南遺為費宰叔仲昭伯為隧正欲善季氏而求媚於南遺謂遺請城費吾多與

而役故季氏城費夫文子相三君無衣帛之妾無食粟之馬無藏金玉無重器備則固忠於公室而不顧其所食之私邑也及行父卒宿之不忠遂專魯國之政群小媚之無故勞民矣與是役季氏益張其後孔子行乎季孫三月不違至於帥師墮費其越禮不度可知矣然則書城費乃履霜堅冰之戒強私家弱公室之萌據事直書而義自見矣用人不惟其賢惟其世豈不殆哉

秋季孫宿如衛○八月螽冬十月衛侯使孫林父來聘壬戌及孫林父盟○楚公子貞帥師圍陳十有二月公會晉侯宋公陳

侯衛侯曹伯莒子邾子于鄆鄭伯髡頑如

會未見諸侯丙戌卒于鄆鄆于軌反髡苦門反鄆七報反又來南反

按鄭喜公三傳皆以為弑而春秋書卒者左氏則曰以癘疾赴也公羊則曰為中國諱也穀梁則曰不使夷狄之民加乎中國之君也夫弑而可以偽赴又順其欲而不彰則亂臣賊子免於見討而春秋非傳信之書矣然則弑而書卒二傳以為為中國諱不使夷狄之民加中國之君疑得聖人之意顧習其說者未之察爾夫弑君之賊其惡不待貶絕而自見矣見弑者豈無不善之積以及其身者乎衛桓則以嫡母無寵宋殤則以亟戰疲民齊襄則以行同鳥獸鄆夷則以侮慢大臣蔡固則以滯

而不父陳平國則以殺諫臣而通于夏氏。楚處則以侈行無禮奚齊則以孽孽而國人不之君。吳餘祭則以輕近刑人而晉州蒲欲盡去群大夫而立其左右也。若夫鄭僖公則異於是矣。中國者禮義之所出也。夷狄者禽獸之與鄰也。僖公欲從諸侯會于鄆則其貴禮義為中國之君也。諸大夫欲皆諸夏與荆楚則其近禽獸為夷狄之民也。以中國之君而見弑於夷狄之民豈有不善之積以及其身者乎。聖人至是傷之甚懼之甚故變文而書曰鄭伯髡頭如會未見諸侯。丙戌卒于鄆未見諸侯。其曰如會何致其志也。諸侯卒于境內不地鄆鄭邑也。其曰卒于鄆見其弑而隱之也。卒鄭伯逃歸陳侯聖人之旨微而公穀之義精矣。存天理抑人欲之意遠矣。

### 陳侯逃歸

穀梁子曰逃義曰逃。逃者四夫之事。上二年諸侯伐陳令楚令尹來伐諸侯又救之亦旣勤矣。為陳侯計者下令國中大夫備立太子以固守親聽命於諸侯謀禦敵之策當是時晉君方明八鄉和睦諸侯聽命必能致力於陳矣。不此之顧棄義衛而逃歸此匹夫之事耳。大義路也。禮門也。輕棄中國惟蠻夷之懼是不能由是路出入是門故書逃歸以罪之可謂深切著明矣。

丙 靈王 八年 齊悼八 齊靈十七 衛獻十二  
甲 七年 蔡景二十七 鄭簡公 嘉元年  
曹成十三 陳哀四 杞孝二 宋平十一 秦  
景十二 楚共二十六 吳壽夢二十六

春王正月公如晉○夏葬鄭僖公鄭人侵  
蔡獲蔡公子燮○季孫宿會晉侯鄭伯齊  
人宋人衛人邾人于刑丘

蘇轍曰晉悼公脩文襄之業改命朝聘之數使諸  
侯之大夫聽命於會大夫稱人衆辭也朝聘之節  
儉而有禮衆之所安也臣則以爲大夫稱人貶之  
也昔周公戒成王以繼自今我其立政立事夫不  
自爲政而委於臣下是以國之利器示人而不知  
寶也朝聘事之大者重煩諸侯而使大夫聽命無  
乃以姑息愛人而不由德乎使政在大夫而諸侯  
失國又豈所以愛之也後此八年溴梁之會悼公

初設諸侯皆在而大夫獨盟君若贅旒夫豈一朝  
一夕之故哉故邢丘之事魯公在晉而季孫宿會  
見魯之失政也諸侯之大夫貶而稱人謹其始也

公至自晉○莒人伐我東鄙○秋九月大

雩○冬楚公子貞帥師伐鄭

齊宣王問於孟子交鄰國有道乎孟子曰有惟智  
者爲能以小事大故大王事熏鬻句踐事吳以小  
事大畏天者也畏天者保其國鄭介大國之間因  
強楚之令而欲息肩於晉若能信任仁賢明其刑  
政經畫財賦以禮法自守而視比四鄰必能保其  
封境荆楚雖大何畏焉而子耳子國加兵於蔡獲  
公子變無故怒楚所謂不脩文德而有武功者也



楚人來討不從則力不能敵從之則晉師必至故  
國人皆喜而子產獨不順焉以晉楚之爭鄭自茲  
弗得寧矣是以獲公子突特書侵蔡以罪之而公  
子貞來伐鄭及楚平不復書矣平而不書以見鄭  
之屈服於楚而不信也犧牲玉帛待於境上以待  
強者而請盟其能國乎

### 晉侯使士匄來聘

丁靈王九年晉悼九齊靈十八衛獻十三

西八年蔡景二十八鄭簡二曹成十

四陳哀五杞孝三宋平十二秦景  
十三楚共二十七吳壽夢二十二  
春宋災○夏季孫宿如晉○五月辛酉大

人姜氏薨秋八月癸未葬我小君穆姜○

冬公會晉侯宋公衛侯曹伯莒子邾子滕

子薛伯杞伯小邾子齊世子光伐鄭十有

二月己亥同盟于戲戲許

鄭之見伐於楚子駟欲從楚子展曰小國無信兵  
亂日至亡無日矣請完守以老楚仗信以待晉其  
策未為失也而子駟遂及楚盟於是晉師至矣諸  
侯伐鄭晉人令於列國修器備盛餼糧歸老幼若  
疾于虎牢肆皆圍鄭鄭人恐乃行成荀偃曰遂圍  
之以待楚人之救而與之戰不然無成知罃曰許

之盟而還師以敗楚。吾三分四軍與諸侯之銳以  
 逆來者於我未病楚不能矣。猶愈於戰暴骨以逞  
 不可以爭大勞未艾。君子勞心小人勞力。先王之  
 制也。乃許鄭成同盟于戲。夫善為國者不師善師  
 者不陣。善陣者不戰。知武子明於善陣之法。以位  
 晉悼公屢與諸侯伐鄭。楚輒救之而不與之戰。楚  
 師遂屈得善勝之道矣。故下書蕭魚之會以美之。

楚子伐鄭

春秋集傳卷之二十五終

